



Minister Otmar Oduber a reuni cu OPERA Amsterdam

September 2016

Museo Industrial ta habri su portanan den Watertoren na San Nicolas



DURANTE su bishita di trabou na Hulanda, Minister Otmar Oduber a probecha pa reuni cu OPERA Amsterdam, pa ricibi e ultimo detayenan di e proyecto di museonan na San Nicolas. Conhuntamente cu ‘cultural attache’ sr. Angelo Tromp, consehero di Ministerio di Cultura, Indra Zaandam y directora di FMA Anky Vrolijk a sinta na mesa cu Sr. Jeroen Luttikhuis, director di OPERA Amsterdam conjuntamente cu sr. Frans Bevers, cu ta fundado di OPERA Amsterdam.

OPERA Amsterdam ta un compania mundialmente conoci pa su habilidad di crea un diseño di exposicion di museo riba un nivel halto y reconoci internacionalmente. Nan tin amplio experiencia cu diferente tipo di museo den henter Europa. Minister Oduber y demas anfitrionnan a ricibi presentacion di e concepto cu OPERA

Amsterdam tin pa e exposicion di Museo Industrial ubica den nos Watertoren na San Nicolas.

Ta trahando cu partnernan internacional y principalmente cu partnernan local, pa den un miho forma trece e historia di tur e industrianan riba nos isla.

Museo Industrial lo conta tur e narrativa nan di e desaroyo di nos industrianan cual ta oro, fosfaat, aloe, petroleo, turismo y “berde” of sostenibel, pero tambe ki impacto cada uno tabatin pa Aruba. Nan a duna un update di e proyecto, y a stipula un fecha pa habri e museo aki cual ta 13 di september proximo.

E expertonan a presenta e concepto y diferente componente cu lo forma parti di e exposicion manera ta e aspecto interactivo y accesibilidad.

Durante e preparacion a acumula hopi material

tanto riba potret, video y otro materialnan di nos herencia y lo inclui esaki den e exposicion den e museo. Enfoke di Ministerio ta pa haci nos cultura y historia accesibel pa un y tur. Den cuadro di e mesun maneho aki kier a crea un forma pa personanan cu limitacion fisico tambe disfruta di e atraccion special aki. Como cu e museo ta un monumento riba su mes e ta complica e situacion y como tal ta dificil pa ahusta e edificio pa crea accesibilidad pa e personanan aki.

Sr. Jeroen Luttikhuis ta splica cu a pensa riba un concepto pa e personanan cu no por bay ariba na e di dos piso, por haya e mesun experiencia interactivo riba e piso abou mes. Awo cu un miho bista di kico lo por spera y ta cla pa sigui cu e trabounan pa por yega na e culminacion di e proyecto unda lo tin e apertura oficial september e aña aki.